

重陽全真集序

全真之教大矣哉謂真者至純不雜浩劫常存一元之始祖萬殊之大宗也上古之初人有純德性若嬰兒不牧而自治不化而自理其居于于自適自得莫不康甯享壽與道合其真也降及後世人性漸殊道亡德喪樸散純離情酒慾殺蠹於中愁霜悲火魔於外性隨情動情逐物移散而不收迷而弗返天真盡耗流浪死生逐境隨緣萬劫不復可爲長太息也重陽憫化妙行真人博通三教洞曉百家遇至人於甘河得知友於東海化三州之善士結五社之良緣行化度人利生接物聞真風者咸敬憚之杖屨所臨人如霧集有求教言來者不拒詩章詞曲疏道藏輯要

重陽全真集
序上

壹

胃集一
X 1/8

頌雜文得於自然應酬卽辨大率誘人還醅返樸靜息虛凝養巨初之靈物見真如之妙性識本來之面目使復之於真常歸之於妙道也或問真人者曰人生天地間雖曰最靈亦萬物中一物耳孰能逃陰陽之數孰能出造化之機有始必有終有生必有死此自然之常理也不稟異氣仙不可求不契夙緣道不可學豈可苦身約己如繫影捕風鏤冰雕朽爲必不得之事求難成之效哉真人喟然歎曰長生妙理人具仙材孰不可求有怠而弗成者顯而至多有勤而取驗者隱而甚少世人以多見爲信以不見爲疑遂以仙事茫茫爲不可期也試以物理驗之鑛之鍛鍊可以爲鐵銅之點化可以爲金魚超吕梁而爲龍雉

入大水而化蜃冰之易消者也藏之可以度夏草之易衰者也
覆之可以越冬人能割愛去貪守雌抱一遊心於恬淡合炁於
虛无亦可以高舉遠致躡景登虛逍遙乘禦寇之風往來飛應
眞之錫騎鯨而遊滄海跨鳳而上青冥千年化兮如遼東之鶴
望日朝兮若葉縣之鳧與安期羨門之流洪崖洞玄之屬同列
仙班不爲難矣古今得道輕舉者不可勝數子謂無徵如聾者
不聞有絲竹之音瞽者不知有丹青之色彼淺見謏聞烏足以
語道哉問者屏息汗顏而退眞人開方便門示慈悲海出人於
炎炎火宅提人於浩浩迷津識性命之祖宗和氣神之子母有
无會於一致空色泯於兩忘使入是門者如南柯夢覺由是路

道藏輯要

重陽全真集
序上

二

胃集一
×文×

者似中山之酒醒返我之眞無欠無餘復入於混成歸我之宗
不墜不失復同於太始眞一之性湛然圓明變化感通无所而
不適也眞人羽化之後門人哀集遺文約千餘篇辭源浩博旨
意弘深涵泳眞風包藏妙有實修真之根柢度人之梯航也京
兆道眾聚財發藁雖已印行而東州奉道者多以去版路遙欲
購斯文不易得也長生劉公教門標的仙宗羽儀爲一代之師
眞作四方之教主謂全眞之風起於西興於東徧於中外其教
廣矣大矣乃命曹瑱來靈玉徐守道劉眞一梁通眞翟道清等
化緣特詣吾鄉求序於澤以眞人文集分爲九卷載開版印行
廣傳四方俾後人得是集者研窮其辭如鑿井見泥去水不遠

鑽木見烟知火必近使人人平悟而速成實仁者之用心也噫
自古修真之士或跣足尋師而師不遇或斷臂問法而法不知
至於皓首窮年莫知所措虛過一生深可惜也今全真文集散
落人間妙用玄機昭然易見學者宗之大修則大驗小求則小
得士之志於道者適遇斯時何其幸也大定戊申清明一日甯
海州學正范懌德裕謹序

道藏輯要

重陽全真集
序上

三

胃集一
一×八